
Votaziun dal pievel

9 da favrer 2020

Emprim project

Iniziativa dal pievel «Per dapli abitaziuns pajablas»

Segund project

Scumond da la discriminaziun pervia da l'orientaziun sexuala



Schweizerische Eidgenossenschaft
Confédération suisse
Confederazione Svizzera
Confederaziun svizra

Emprim project**Iniziativa dal pievel «Per dapli abitaziuns pajablas»**

Curtamain	→	4–5
Detagls	→	8
Arguments	→	12
Text da votaziun	→	16

Segund project**Scumond da la discriminaziun pervia
da l'orientaziun sexuala**

Curtamain	→	6–7
Detagls	→	18
Arguments	→	22
Text da votaziun	→	26



Ils videos da
la votaziun:
admin.ch/videos_rm



L'app davart
las votaziuns:
VoteInfo

Curtamain

Iniziativa dal pievel «Per dapli abitaziuns pajablas»

Situaziun da partenza

Oravant tut en territoris urbans è la purschida da spazi d'abitar fin l'onn 2015 daventada stgarsa. Fin l'onn 2016 èn er s'augmentads ils tschains da locaziun. La stgarsezza e la chareschia eran ina consequenza da la buna situaziun econo-mica e da la gronda creschientscha da la populaziun.

Il project

L'iniziativa pretenda che la Confederaziun ed ils chantuns promovian pli fitg abitaziuns da locaziun favuraivlas. En l'entira Svizra duain almain 10 pertschient da las abitaziuns construidas da nov appartegnair a pertadars d'immobiglias d'util public – per regla èn quai societads cooperativas per la construcziun d'abitaziuns. Per promover la construcziun d'abitaziuns d'util public duain ils chantuns e las vischnancas pudair introducir in dretg da precumpra per sai. Per bains immobiliars en proprie-tad da la Confederaziun u d'interpresa federalas survegnissan ils chantuns e las vischnancas en general in dretg da pre-cumpra. La finala vul l'iniziativa impedir che subvenziuns per sanaziuns energeticas mainian a soluziuns da luxus e rendian las abitaziuns sproporziunadament charas. Il Cussegl federal ed il parlament refusan l'iniziativa. Il parlament ha però deliberà medis finanzials supplementars per il fond existent a favur da la construcziun d'abitaziuns d'util public. Quest uschenumnà «Fonds de Roulement», dal qual vegnan concedids emprests, vegn augmentà mo, sche l'iniziativa dal pievel vegn refusada.

Detagls	→	8
Arguments	→	12
Text da votaziun	→	16

Dumonda
da votaziun

Vulais Vus acceptar l'iniziativa dal pievel «Per dapli abitaziuns pajablas»?

Recumandazion
dal Cussegli federal
e dal parlament

Na

Per il Cussegli federal e per il parlament èsi cler: I dat avunda abitaziuns da locaziun per pretschs supportabels. Gia oz garantescha la Constituziun federala la promozion da la construcziun d'abitaziuns d'util public – senza quota fixa. La promozion d'abitaziuns vertenta è sa cumprovada. La realisazion da l'iniziativa custass sproporzionadament bler.

 admin.ch/abitaziuns-pajablas

Recumandazion
dal comité
d'iniziativa

Gea


Tenor il comité d'iniziativa datti en Svizra memia paucas abitaziuns pajablas. Il motiv per l'augment dals tschains da locaziun è che las proprietarias ed ils proprietaris d'immobiglias vulan pli e pli grondas renditas. L'iniziativa pretenda dapli abitaziuns en la proprietad da purtaders da chasas d'abitar d'util public, perquai che quels lavuran senza finamira da rendita.

 bezahlbare-wohnungen.ch
 mieterverband.ch

Votaziun en
il Cussegli naziunal



Votaziun en
il Cussegli dals
chantuns



Curtamain**Scumond da la discriminaziun
pervia da l'orientaziun sexuala****Situaziun da
partenza**

Il dretg penal svizzer protegia umans cunter differentas furmas da la discriminaziun. Uschia sa fa chastiabel, tgi che discreditescha en la publicitat cun pleds u cun acziuns ina persuna u ina gruppera da personas pervia da sia razza, pervia da sia etnia u pervia da sia religiun. Il parlament ha decidi da meglierar la protecziun e d'estender la norma penala anti-rassistica. Da nov duai esser chastiabla er ina discriminaziun pervia da l'orientaziun sexuala. Cunter quai è vegnì fatg in referendum.

Il project

Cun l'extensiun da la norma penala vegnan protegidas da nov er personas che vegnan discriminadas pervia da lur omo-, etero- u bisexualidad. Scumandadas èn remartgas u acziuns publicas che violeschan la dignitat d'ina persuna u d'ina gruppera da personas e che sveglian uschia in clima d'odi e pericleteschan la convivenza paschailva da la societad. Chastiabel sa fa er, tgi che refusa ad ina persuna pervia da sia orientaziun sexuala ina prestazion purschida publicamain. La norma penala na vala dentant betg per remartgas u per acziuns en il ravugl da la famiglia u en il circul d'amis. Er discussiuns objectivas en la publicitat n'en betg pertutgadas da quai e restan vinavant permessas.

Detagls	→	18
Arguments	→	22
Text da votaziun	→	26

Dumonda
da votaziun

Vulais Vus acceptar la midada dals 14 da december 2018 dal Cudesch penal e da la Lescha penala militara (Discriminaziun ed incitazion a l'odi pervia da l'orientaziun sexuala)?

Recumandaziun
dal Cussegli federal
e dal parlament

Gea

Tenor l'avis dal Cussegli federal e dal parlament na dastga nagin vegnir discriminà pervia da sia omo-, etero- u bisexualitat. Quai tutga tar ils dretgs fundamentals che vegnan garantids da la Constituziun federala. L'extensiun dal dretg penal meglierescha la protecziun cunter discriminaziun. La libertad d'exprimer sia opiniun na vegn betg violada tras quai.

 admin.ch/scumond-discriminaziun

Recumandaziun
dal comité
da referendum

Na


Tenor il comité sa tracti tar la lescha che vegn vendida sco protecziun cunter discriminaziun, en vardad d'ina lescha da censura. Quella pericleteschia la libertad d'opiniun sco er la libertad da conscienza e da mastergn. Ultra da quai na saja la lescha betg necessaria: Tgi che offendia u umiliechia publica-main persunas, vegnia chastià gia oz.

 zensurgesetz-nein.ch

Votaziun en
il Cussegli naziunal



Votaziun en
il Cussegli dals
chantuns



Detagls**Iniziativa dal pievel
«Per dapli abitaziuns pajablas»**

Arguments dal comité d'iniziativa	→	12
Arguments dal Cussegl federal	→	14
Text da votaziun	→	16

Situaziun da partenza

L'iniziativa è vegnida inoltrada l'onn 2016, cura che la purschida d'abitaziuns da locaziun è daventada stgarsa en intginas regiuns da la Svizra ed ils tschains da locaziun èn per part s'augmentads fermamain. Ils motivs per quest svilup eran la buna situaziun economica e la gronda creschientscha da la populaziun. En tut la Svizra n'èn betg vegnididas construidas avunda novas abitaziuns per cuvrir il basegn. La quota da las abitaziuns vidas è sa diminuida tranter ils onns 2007 e 2012. Pir suenter èn vegnididas construidas mintga onn uschè bleras abitaziuns che la cifra d'abitaziuns vidas è puspè s'augmentada.¹

Purschida d'abitaziuns da locaziun dapi 2016

Il martgà per abitaziuns da locaziun era l'onn 2016 tut en tut puspè equilibrà: l'offerta e la dumonda s'equivalevan pli u main. Dapi lura datti en media ina pitschna surofferta. La quota d'abitaziuns vidas è s'augmentada cuntinuadament.

Svilup dals pretschs da locaziun

Tranter ils onns 2008 e 2016 è s'augmentada la media dals tschains da locaziun², schebain ch'il tschains da referencia ch'è decisiv per adattar ils tschains è sa reduci fermamain³. Dapi l'onn 2016 sa reduceschan las medias dals pretschs per abitaziuns affittadas da nov u puspè affittadas – er per abitaziuns dal segment da pretschs bass è il martgà puspè quasi equilibrà.

- 1 La quota da las abitaziuns vidas vegn eruida da l'Uffizi federal da statistica (UST) e preschentada cun l'uschenumnada «cifra d'abitaziuns vidas». Tranter ils onns 2007 e 2012 è la quota d'abitaziuns vidas sa reducida dad 1,07 % a 0,95 %. Il 1. da zercladur 2019 importava la cifra d'abitaziuns vidas 1,66 % (<https://www.bfs.admin.ch> > Statistiken finden > Bau- und Wohnungswesen > Wohnungen > Leerwohnungen).
- 2 L'Uffizi federal d'abitaziuns cumpilescha ils indicaturs ils pli impurtants dal martgà d'abitaziuns, tranter auter er il svilup dals pretschs d'abitaziuns da locaziun (<https://www.bwo.admin.ch> > Wohnungsmarkt > Marktirtschaftliche Wohnungsversorgung > Wohnungsmarkt auf einen Blick > Mengen- und Preisindikatoren > Preisentwicklung: Mietwohnungen).
- 3 Il tschains da referencia che vala per adattar ils tschains da locaziun è sa reduci tranter ils onns 2008 e 2016 da 3,50 % ad 1,75 %. Il tschains da referencia vegn calculà sin basa da la media da la tariffa da tschains per emprests ipotecars en Svizra. Sch'il tschains da referencia sa mida, po in locatari far valair in dretg d'adattazion dal tschains da locaziun envers il locatur (<https://referenzzinssatz.admin.ch>).

**Situaziun
regionalmain
differentia**

La situaziun è dentant fitg differenta da regiun a regiun. En tschertas citads, aglomeraziuns ed en tscherts territoris turistics èn ils pretschs s'augmentads cleramain pli fitg ch'en las regiuns ruralas. Gist en il territori urban poi anc adina esser difficil da chattar in'abitaziun che correspunda a las pussaivladdas finanzialas.

**Pretensiuns
da l'iniziativa
quota minimala**

La finamira da l'iniziativa dal pievel è quella ch'i stattan a disposiziun dapli abitaziuns da locaziun favuraivlas. Ina rolla centrala duain en quest connex giugar ils pertadars da chasas d'abitar d'util public – per regla èn quai societads cooperativas per la construcziun d'abitaziuns. L'iniziativa pretendia che pertadars da chasas d'abitar d'util public cuntanschian ina quota dal martgà pli e pli gronda. Per quest intent duai la Confederaziun – en collavurazion cun ils chantuns – procurar che pertadars da chasas d'abitar d'util public construeschian en l'entira Svizra almain 10 pertschient da las abitaziuns novas.

dretg da precumpra

Er ils dretgs da precumpra dals chantuns e da las vischnancas duain gidar ad augmentar la quota da pertadars da chasas d'abitar d'util public. L'iniziativa pretendia ch'ils chantuns e las vischnancas possian introducir in dretg da precumpra per bains immobigliars adattads per promover la construcziun d'abitaziuns d'util public. Per bains immobigliars en proprietad da la Confederaziun u d'interpresa federalas duain ils chantuns e las vischnancas en general survegnir in dretg da precumpra.

mantegniment
d'abitaziuns da
locaziun favuraivlas

L'iniziativa persequitescha er la finamira da mantegnair abitaziuns da locaziun favuraivlas. Sanaziuns sustegnidals dal maun public na duain betg chaschunar la perdita d'abitaziuns da locaziun favuraivlas. Subvenziuns da la Confederaziun e dals chantuns per renovaziuns energeticas duain pervia da quai vegnir concedidas mo pli, sch'i na vegnan betg fatgas sanaziuns luxuriusas e sche las locatarias ed ils locataris pon restar en l'abitaziun.

Custs da l'iniziativa

En la missiva dal Cussegl federal èn vegnids stimads ils custs per cuntanscher la quota da 10 pertschient. Sche quella stuess vegnir cuntanschida cun ils instruments da promozion existents, stuessan vegnir concedids tschintg giadas dappli emprests che en la media dals ultims onns. Tenor la stimaziun custass quai circa 120 milliuns francs per onn.⁴

Promoziun actuala tras la Confederaziun

Sa basond sin la Constituziun promova la Confederaziun già oz la construcziun d'abitaziuns d'util public. En quest connex stattan dus instruments da promozion en il center: Primo garantescha la Confederaziun ils emprests da la Centrala d'emissiun per pertadars da chasas d'abitar d'util public. Quai permetta ina finanziaziun avantagiusa da spazi d'abitar ed uschia tschains da locaziun favuraivels.⁵ Secundo maina la Confederaziun in fond, or dal qual vegnan concedids a pertadars da chasas d'abitar d'util public emprests che portan tschains e ch'en rembursabels. Dapi l'onn 2003 èn vegnidas sustegnidias cun quest uschenumnà «Fonds de Roulement» la construcziun e la renovaziun da var 1500 abitaziuns da locaziun favuraivlas per onn.⁶

Augment dal fond

Sin proposta dal Cussegl federal ha il parlament decidì d'augmentar il «Fonds de Roulement» durant 10 onns per 250 milliuns francs.⁷ Il credit duai procurar che la construcziun d'abitaziuns d'util public possia tegnair sia quota da martgà naziunala da var 4 pertschient. Il fond vegn augmentà mo, sche l'iniziativa dal pievel vegn refusada.

4 Missiva tar l'iniziativa dal pievel «Per dappli abitaziuns pajablas» e tar in conclus federal davart in credit general per augmentar il «Fonds de Roulement» a favur da la construcziun d'abitaziuns d'util public dals 21 da mars 2018; Fegl uffizial federal 2018 2213 2225 ([☒ admin.ch > Bundesrecht > Bundesblatt](#)).

5 La Centrala d'emissiun per pertadars da chasas d'abitar d'util public è in'associaziun che vegn pertada da las federaziuns da tetg da la construcziun d'abitaziuns d'util public. Ella empresta meds finanzials directamain sin il martgà da chapital per conceder emprests a sias commembras ed a ses commembers.

6 Las amortisaziuns van enavos en il fond e servan a finanziar novs emprests. Questa circulaziun è il motiv per la designaziun «Fonds de Roulement» («fond da rotaziun»).

7 Missiva tar l'iniziativa dal pievel «Per dappli abitaziuns pajablas» e tar in conclus federal davart in credit general per augmentar il «Fonds de Roulement» a favur da la construcziun d'abitaziuns d'util public dals 21 da mars 2018; Fegl uffizial federal 2018 2213 2234 ([☒ admin.ch > Bundesrecht > Bundesblatt](#)).

Arguments

Comité d'iniziativa

En Svizra datti memia paucas abitaziuns pajablas. Malgrà ch'ils tschains bancars èn fitg bass, creschan ils pretschs da locaziun, perquai ch'ils possessurs d'immobiglias vulan pli e pli grondas renditas. Auter è quai tar pertadars d'immobiglias d'util public: Els lavuran senza finamira da rendita e dumondan tschains da locaziun bler pli bass. L'iniziativa pretendà dapli abitaziuns d'util public. Ina vasta allianza da federaziuns da locataris, da societads da construcziun e da proprietaris da chasas sco er d'organisaziuns da vegliadetgna e da giuventegna sustegna l'intent.

Per dapli abitaziuns pajablas

L'iniziativa stgaffescha dapli abitaziuns pajablas. Quellas èn impurtantas cunzunt per famiglias e per la classa mesauna. Il tschains da locaziun è numnadamat lunschor il pli grond post d'expensas dal budget d'ina chasada.

Limitar la speculaziun

Ils tschains da locaziun èn crescids ils ultims onns cuntinuadamat – malgrà tschains bancars bass. En blers lieus è il martgà d'abitaziuns anc adina fitg precar. Las locatarias ed ils locataris pajan tschains da locaziun bler memia auts. Sch'ils tschains da locaziun fissan vegnidis adattads a la reducziun dals tschains bancars, stuessan els esser oz 40 percents pli bass. En la construcziun d'abitaziuns d'util public n'en tschains da locaziun excessivs ed augments arbitrars dals tschains da locaziun betg pussaivels. Uschia vegn il spazi d'abitar exclus duraivlamain da la speculaziun.

Per tschains da locaziun pli bass

Purtadars d'immobiglias d'util public pretendan per lur abitaziuns mo uschè bler, sco quai che quellas custan effectivamain. Ils tschains da locaziun èn perquai cleramain pli bass ch'en relaziuns da locaziun cun finamira da rendita. La differenza importa tranter dus e trais tschains da locaziun mensils per onn.

Per il bainstar general

Da la construcziun d'abitaziuns d'util public na profitan betg mo sias locatarias e ses locataris, mabain l'entira societad: Ella ha in effect mitigant sin ils pretschs dal martgà d'abitaziuns, porscha in'auta segirezza d'abitar, procura per ina maschaida sociala e distgargia las ovras socialas. Abitadis da societads cooperativas èn persistentes e porschan savens servetschs ed infrastructuras per entirs quartiers.

Realisaziun efficazia L'iniziativa pretendia ch'i vegnian mess a disposiziun dapli areals per abitaziuns d'util public. Per quest intent dovrà cunzunt mesiras fitg efficazias da la planisaziun dal territori.

Abitar è in dretg fundamental Abitar tutga tar ils basegns fundamentals. Perquai sto la politica procurar che tut la glieud possia chattar in'abitaziun adequata e pajabla. Quai è fixàgia oz en la Constituziun federala. L'iniziativa realisescha finalmain questa incumbensa.

Per sanaziuns energeticas gistas Sanaziuns energeticas èn impurtantas per la protecziun dal clima. Daners da promozion èn in agid, per che talas sanaziuns daventian finanzialmain supportablas. Ma displa-schaivlamain survegnan las firmas d'immobiglias er lura subvenziuns, sch'ellas disdeschan tut ils contracts da locaziun da l'immobiglia u sch'ellas fan ina renovaziun luxuriosa. A quai metta questa iniziativa ina fin.

Recumandaziun dal comité d'iniziativa Perquai recumonda il comité d'iniziativa:

Gea

-  bezahlbare-wohnungen.ch
-  mieterverband.ch

Arguments

Cussegl federal

L'iniziativa fa prescripcions memia severas e va memia lunsch. La construcziun d'abitaziuns duai s'orientar al basegn e betg ad ina quota. La realisaziun fiss colliada cun gronds custs e cun blera lavur administrativa. La promozion d'enfin ussa è sa cumprovada, perquai che cun ella vegnan sustegnids en ina moda che correspunda als basegns projects d'abitaziuns d'util public. Il Cussegl federal refusa il project cunzunt per ils sustants motivs:

Avunda spazi d'abitar

La pretensiun, tenor la quala 10 pertschient da las abitaziuns construidas da nov duain esser en il futur en possess da pertadars d'immobiglias d'util public, è surfatga. Tut en tut datti avunda spazi d'abitar bun e finanzialmain supportabel. Uschia è la surfatscha d'abitar che stat en media a disposiziun a mintga persuna, daventada pli gronda, entant che la media da la grevezza tras la locaziun importa dapi blers onns var in tschintgavel da las entradas da las chasadas.

Gronds custs

Sche la quota da 10 pertschient stuess veginr cuntanschida cun ils instruments da promozion existents, fissan necessaris tschintg giadas dapli emprests che oz. Mintga onn stuess la Confederaziun metter a disposiziun var 120 milliuns francs. Ultra da quai vegniss chaschunada blera lavur administrativa.

Nagins privilegis

Privilegis per pertadars d'immobiglias d'util public cuntradin a la chapientscha da concurrenza da l'economia da martgà. Sche societads cooperativas per la construcziun d'abitaziuns na fissan betg en cas da finanziar la quota d'abitaziuns novas pretendida, stuess gidar il maun public.

Il dretg da precumpra dischavantagescha persunas privatas

Ils dretgs da precumpra pretendids dischavantageschan las persunas privatas e n'en betg raschunaivels. Ils chantuns dastgan introducir gia oz dretgs da precumpra sut tschertas cundiziuns. Plinavant pon chantuns e vischnancas acquistar bains immobiliars da la Confederaziun per pretschs da martgà. Bains immobiliars adattads d'interpresa federalas sco per exemplu da las Vifliers federalas vegnan vendids plitgunsch darar.

La strategia d'energia vegn sutminada

Il subvenziunament da sanaziuns energeticas sustegna la strategia d'energia 2050. Restricziuns sutminassan questa strategia. Ultra da quai profiteschon las locatarias ed ils locataris, perquai che custs accessoricis pon vegnir spargnads suenter la sanaziun. E perquai ch'il subvenziunament sto vegnir resguardà en cas da relaziuns da locaziun existentes, na dastgan ils tschains da locaziun betg vegnir augmentads a bainplaschair.

Promoziun cumprovada

En singulas regiuns èsi per propri difficil da chattar spazi d'abitar adattà. Pervia da quai duai il fond existent vegnir augmentà a favur da la construcziun d'abitaziuns d'util public. Quel è sa cumprovà. L'augment concludì dal parlament maina meglier a la finamira che l'iniziativa che siglia sur las lattas ora cun la prescripziun severa da 10 pertschient.

Recumandaziun dal Cussegli federal e dal parlament

Per tut quests motivs recumondan il Cussegli federal ed il parlament da refusar l'iniziativa dal pievel «Per dapli abitaziuns pajablas».

Na

 admin.ch/abitaziuns-pajablas

§

Text da votaziun

**Conclus federal davart l'iniziativa dal pievel
«Per dapli abitaziuns pajablas»
dals 22 da mars 2019**

*L'Assamblea federala da la Confederaziun svizra,
sa basond sin l'artitgel 139 alinea 5 da la Constituziun federala¹,
suenter avair examinà l'iniziativa dal pievel «Per dapli abitaziuns pajablas»
ch'è vegnida inoltrada ils 18 d'october 2016²,
suenter avair gi invista da la missiva dal Cussegli federal dals 21 da mars 2018³,
concluda:*

Art. 1

¹ L'iniziativa dal pievel dals 18 d'october 2016 «Per dapli abitaziuns pajablas» è valaivla e vegn suttamessa a la votaziun dal pievel e dals chantuns.

² L'iniziativa ha il suandard text:

La Constituziun federala vegn midada sco suonda:

Art. 108 al. 1 e 5–8

¹ En collaurazion cun ils chantuns promova la Confederaziun la purschida d'abitaziuns da locazion favuraivlas. Ella promova l'acquist da proprietad d'abitaziuns e da chasas destinadas al diever persunal da privats sco er l'activitatda da pertaders ed organisaziuns per la construcziun d'abitaziuns d'util public.

⁵ Ella procura ch'ils programs dal maun public ch'èn destinads a la promozion da sanaziuns na chaschunian betg ina perdita d'abitaziuns da locazion favuraivlas.

⁶ En collaurazion cun ils chantuns persequitescha ella in augment permanent da la quota d'abitaziuns da pertaders per la construcziun d'abitaziuns d'util public, cumpareglià cun il dumber total d'abitaziuns. En collaurazion cun ils chantuns procura ella che almain 10 pertschient da las abitaziuns construidas da nov sajan – sin nivel naziunal – en proprietad da queste pertaders.

⁷ Per promover la construcziun d'abitaziuns d'util public autorisescha ella ils chantuns e las vischnancas d'introducir a lur favor in dretg da precumpra per bains immobigliars adattads. Ultra da quai als conceda ella in dretg da precumpra en cas da la vendita da bains immobigliars ch'èn en proprietad da la Confederaziun u d'interpresas federalas.

⁸ La lescha fixescha las mesiras ch'èn necessarias per cuntanscher las finamiras da quest artitgel.

¹ CS 101

² Fegl uffizial federal 2016 8357

³ Fegl uffizial federal 2018 2213

§

Art. 197 cifra 12⁴

12. Disposiziun transitorica tar l'art. 108 al. 1 e 5–8

(Promozion da la construcziun d'abitaziuns e da la proprietad d'abitaziuns)

Sche la legislazion executiva respectiva n'è anc betg entrada en vigur 2 onns suenter l'acceptazion da l'artitgel 108 alineas 1 e 5–8 tras il pievel ed als chantuns, decretescha il Cussegli federal per quest termin las disposiziuns executivas transitoricas en in'ordinaziun.

Art. 2

L'Assamblea federala recumonda al pievel ed als chantuns da refusar questa iniziativa.

⁴ La cifra definitiva da questa disposiziun transitorica vegn fixada da la Chanzlia federala suenter la votaziun dal pievel.

Detagls**Scumond da la discriminaziun
pervia da l'orientaziun sexuala**

Arguments dal comité da referendum →	22
Arguments dal Cussegl federal e dal parlament →	24
Text da votaziun →	26

Regulaziun actuala

Oz cuntegnan il Cudesch penal e la Lescha penala militara ina disposiziun che protegia cunter discriminaziun ed incitaziun a l'odi pervia da la razza, pervia da l'etnia u pervia da la religiun.¹ Tgi che cuntrafa a quai, ristga in chasti da detenziun fin a 3 onns u in chasti pecuniar. Questa norma penala anti-rassistica han las votantas ed ils votants acceptà en ina votaziun da referendum.² Ella è en vigur dapi il 1. da schaner 1995.

Nov: orientaziun sexuala

Adina puspè vegnan umans attatgads verbalmain u corporalmain en la publicitat pervia da lur orientaziun sexuala. Sco reacziun sin quai ha il parlament decidi da meglierar la protecziun e d'estender la norma penala existenta. Da nov duai esser scumandada er la discriminaziun pervia da l'orientaziun sexuala. Cun orientaziun sexuala è manegià, sch'ina persuna sa senta attratga da persunas da l'autra schlattaina (eterosexual), da la medema schlattaina (omosexual) u da tuttas duas schlattainas (bisexual). Betg manegiadass n'en l'identitat da schlattaina u preferenzas e praticas sexualas.

Premissas per la chastiabladad

public

In cumportament discriminant è chastiabel mo sut tschertas premissas. Quellas valan er per la norma penala extendida.

In cumportament discriminant è chastiabel mo, sch'el ha lieu publicamain. Remartgas en il ravugl da la famiglia u en il circul d'amis, per exemplu a la maisa radunda, n'en betg scumandadas.

1 Art. 261^{bis} dal Cudesch penal, CS 311.0; art. 171c al. 1 da la Lescha penala militara, CS 321.0

([admin.ch > RM > Dretg federal > Collecziun sistematica](#)).

2 La midada dal Cudesch penal e da la Lescha penala militara è vegnida acceptada en la votaziun dal pievel dals 25 da settember 1994 cun 54,6 %; Fegl uffizial federal 1994 V 531 ([admin.ch > Bundesrecht > Bundesblatt](#)).

intenziunà

In cumporment discriminant è chastiabel mo, sch'el ha lieu intenziunadomain. Quai vul dir, la delinuenta u il delinquent è conscient ch'il cumporment umiliescha in'autra persuna e fa tuttina u apostea quai.

misantròp

In cumporment discriminant è chastiabel mo, sch'el violescha la dignitat humana. Quai è il cas, sche dretgs vegnan refusads a tschertas persunas u sche tschertas persunas vegnan designadas u tractadas sco umans inferiurs.

Acts chastiabels

Ultra d'umiliaziuns èn chastiabels differents auters acts: per exemplu propaganda u incitaziuns a l'odi cunter persunas pervia da lur orientaziun sexuala. Plinavant na dastga en il futur nagin refusar ad ina persuna pervia da sia orientaziun sexuala ina prestazion purschida publicamain. Las ustarias na dastgan per exemplu betg tramerter davent giasts, perquai che quels èn omosexuals. En hotels, interpresas da transport, scolas, bibliotecas u kinos e bogns publics na dastgan betg discriminar las visitadoras ed ils visitaders pervia da lur orientaziun sexuala. I n'emporta betg, sch'il cumporment discriminant ha lieu a bucca u en scrit, tras pleuds u cun maletgs e gests.

Provocaziuns e sgnoccas

Er sche la discriminaziun publica pervia da l'orientaziun sexuala è scumandada, dastgan vegnir exprimidas vinavant opiniuns criticas. Perquai dastgi er en l'avegnir vegnir discutà en moda cuntraversa – sco per exemplu actualmain davart la «lètg per tuts». Medemamain pon vegnir exprimidas vistes religiusas e tematisadas differentas valurs. Schizunt remartgas provocativas, caricaturas e sgnoccas n'en betg discriminantas e na vegnan betg chastiadas sin basa da la norma penală extendida – uschè ditg ch'ellas na violeschan betg la dignitat humana.

Protecziun da l'entira gruppia

Oz èn persunas protegidas mo indirectamain cunter discriminaziun, exclusivamain lura, sch'il comportament discriminant cuntrafa ad auters artitgels da lescha (p. ex. violaziun da l'onur u blessura corporala). Plinavant vala quai mo per persunas singulas – la gruppia sco unitad (p. ex. las persunas omosexualas) n'è actualmain betg protegida. Cun l'extensiun da la norma penală vegn meglierada la protecziun.

Chastiabel en auters pajais

En plirs pajais europeics è la discriminaziun pervia da l'orientaziun sexuala gia chastiabla. Il Cussegli da l'Europa e la ONU recumondan a la Svizra da rinforzar la protecziun cunter discriminaziun.

Arguments

Comité da referendum

Na a questa lescha da censura

«Memia blera libertad d'opiniun n'ha anc mai fatg far naufragi ina societad.» Nus duessan pensar a questa declaraziun, adina cur che politichers vulan restrenscher l'expressiun da la libra opiniun. Ed exactamain da quai sa tracti en connex cun l'extensiun da la norma penala antirassistica: Là, nua ch'ins ans vul vender la «protecziun cunter discriminaziun», sa tracti en vardad d'ina lescha da censura che smanatscha la libertad d'opiniun sco er la libertad da conscienza e da mastergn e che na schlia nagins problems.

Odi è gia scumandà

Odi e discriminaziun èn cun dretg scumandads en Svizra. Tgi che permalescha u umiliescha publicamain persunas sin basa da tschertas caracteristicas, vegn condemnà da la societad e sancziunà dal dretg penal. Perquai èsi offendent e fauss d'inculpar pauschalmain la populaziun svizra d'esser dascussa main ostila a l'omosexualitat.

Naginas leschas pseudo-protectivas

Persunas omosexualas èn gia daditg commembraas equivalentas da la societad. Ellas na ston betg vegnir degradadas per lescha ad ina minoritad presumptivamain debla e degna da protecziun. Nus na duvrain naginas leschas pseudo-protectivas per tschertas gruppas. U nua èn las leschas spezialas per persunas handicapadas, attempadas e cun surpresa?

Gia avunda basas giuridicas

Per sa defender cunter violaziun da l'onur, cunter ingiuria, cunter smanatscha, cunter diffamaziun u cunter disfamaziun è il Cudesch penal gia ina basa giuridica solida (art. 173 ss. CP). Ulteriuras leschas che protegian apparentamain cunter discriminaziun, èn simplamain nunneccarias e cuntraproductivas. Pertge che: I n'exista nagin dretg d'esser protegì cunter tut ils cumportaments ch'ins resenta sco offendents.

**Nagina giustia
simpatisanta**

La lescha da censura pretendia da chastiar mo il «pled instigant». Fin nua ch'ils cunfins da la libertad d'opiniun duain propi tanscher, n'è giuridicamain strusch cler. Las experientschas d'enfin ussa cun la norma penal antirassistica han mussà ch'il stadi ristga d'interpretar en moda arbitrara questi cunfins. Tut quai che s'avischina ad ina giustia simpatisanta è fitg privlus per ina democrazia!

**Betg criminalisar
opiniuns**

Oz na sa nagin exactamain, sch'ina critica da l'omosexualità pratigada e d'ulteriuras orientaziuns sexualas, ch'è motivada scientificamain ed ideologicamain, vegn a chaschunar conflicts penals. Las experientschas ch'èn vegnidas fatgas a l'exterior cun las normas penales da discriminaziun mussan ch'ins sto temair precis quai. Da s'occupar criticamain e da s'exprimer publicamain davart l'omosexualidad e davart la bisexualidad duai dentant restar in punct da vista legitim, premess ch'i vegn distinguì tranter las personas sco talas e l'orientaziun sexuala.

**Recumandaziun
dal comité
da referendum**

Perquai recumonda il comité da referendum:

Na

 zensurgesetz-nein.ch

Arguments

Cussegl federal e parlament

Per il parlament è la protecziun da persunas cunter discriminaziun pervia da lur orientaziun sexuala insuffizienta. Cun ina midada dal dretg penal vul el meglierar questa protecziun. La libertad d'exprimer sia opiniu na vegn betg violada tras quai. Discussiuns cuntraversas restan vinavant permessas. Scumandà vegn mo, che persunas vegnan discreditadas publicamain pervia da lur orientaziun sexuala. Il Cussegl federal ed il parlament sustegnan il project cunzunt per ils sustants motivs:

Dapli protecziun cunter discriminaziun

En Svizra na dastga nagin vegnir discriminà pervia da l'orientaziun sexuala. Quai tutga tar ils dretgs fundamentals che vegnan garantids da la Constituziun federala.¹ Per ch'ils umans possian vegnir protegids meglier sto la norma penal vegnir extendida. Da nov èn discriminaziuns pervia da l'orientaziun sexuala chastiablas – independentamain da quai, sch'ellas sa drizzan cunter ina persuna singula u cunter in'entira grupper. Gist oz che las retegnientschas per exprimer odi èn bler pli pitschnas pervia da l'anonimitad supponida da l'internet e ch'in dumber fitg grond da persunas po vegnir cuntschì entaifer curt temp en spezial sur las medias socialas, èsi urgentamain necessari da meglierar questa protecziun.

Libertad d'exprimer sia opiniu garantida

D'exprimer opinius objectivas resta vinavant pussaivel, schizunt, sch'ellas èn formuladas en moda provocativa u exagerada. Las dretgiras dattan ina gronda paisa a la libertad d'exprimer l'opiniun ed applitgeschan la norma penal antirassistica en moda restrictiva. Ina sentenzia pervia d'ina contravenziun cunter la norma penal na vegn betg pronunziada da levsenn. Damai ch'en ina democrazia duai esser permessa critica, particularmain en discussiuns politicas. Tgi che agescha cun respect, na ristga betg in chasti. Scumandà è mo, quai che violescha grevamain il coc da la dignitat humana. Sulettamain incitaziuns a l'odi, discriminaziuns e l'umiliaziun da persunas u da gruppas da persunas vegnan chastiadas.

¹ Art. 8 al. 2 da la Constituziun federala:
«Nagin na dastga vegnir discriminà, particularmain betg pervia [...] da la moda da viver [...]; CS 101
( admin.ch > RM > Dretg federal > Collecziun sistematica).

**Fundamental
per la societad**

La dignitat humana è ina valur fundamentala da nossa societad. La democrazia viva da contacts da respect tranter umans. La discriminaziun periclitescha la convivenza paschaivla e n'ha nagina plazza en ina societad liberala e toleranta. Gist pervia da quai ha la votaziun davart quest project in effect da signal impurtant per ils dretgs fundamentals en Svizra.

**Recumandaziun
dal Cussegli federal
e dal parlament**

Per tut quests motivs recumondan il Cussegli federal ed il parlament d'acceptar la midada dals 14 da december 2018 dal Cudesch penal e da la Lescha penala militara (Discriminaziun ed incitaziun a l'odi pervia da l'orientaziun sexuala).

Gea

 admin.ch/scumond-discriminaziun

§

Text da votaziun

**Cudesch penal e Lescha penala militara
 (Discriminaziun ed incitaziun a l'odi pervia
 da l'orientaziun sexuala)
 Midada dals 14 da decembre 2018**

L'Assamblea federala da la Confederaziun svizra,

suenter avair gi invista dal rapport da la Cumissiun per dumondas giuridicas dal Cussegli nazional dals 3 da matg 2018¹ e da la posiziun dal Cussegli federal dals 15 d'avust 2018²,
concluda:

I

Ils decrets qua sutvart vegnan midads sco suonda:

1. Cudesch penal³

Art. 261bis

Discriminaziun
 ed incitaziun a
 l'odi

Tgi che incitescha publicamain d'odiar u da discriminar ina persuna u ina gruppera da persunas pervia da sia razza, pervia da sia etnia, pervia da sia religiun u pervia da sia orientaziun sexuala,

tgi che derasa publicamain ideologias che han la finamira da discreditar u da disfamar sistematicamain questas persunas u questas gruppas da persunas,

tgi che organisescha, promova u sa participescha ad acziuns da propaganda cun la medema finamira,

tgi che discreditescha u discriminatescha publicamain en ina moda che cuntrafa a la dignitat umana ina persuna u ina gruppera da persunas cun pleuds, cun scrittiras, cun maletgs, cun gests u cun metter maun vi dad ella pervia da sia razza, pervia da sia etnia, pervia da sia religiun u pervia da sia orientaziun sexuala ubain tgi che snega, bagatellisescha malamain u emprova da giustifitgar per quests motivs genocids u auters crims cunter l'umanitat,

tgi che refusa ad ina persuna u ad ina gruppera da persunas pervia da sia razza, pervia da sia etnia, pervia da sia religiun u pervia da sia orientaziun sexuala ina prestaziun offrida ch'è destinada a la generalitat,

vegn chastià cun in chasti da detenziun fin a 3 onns u cun in chasti pecuniar.

¹ Fegl uffizial federal 2018 3773

² Fegl uffizial federal 2018 5231

³ CS 311.0

§

2. Lescha penala militara⁴

Art. 171c al. 1

Discriminaziun
ed incitaziun a
l'odi

¹ Tgi che incitescha publicamain d'odiar u da discriminar ina persuna u ina gruppera da persunas pervia da sia razza, pervia da sia etnia, pervia da sia religiun u pervia da sia orientaziun sexuala,

tgi che derasa publicamain ideologias che han la finamira da discreditar u da disfamar sistematicamain questas persunas u questas gruppas da persunas,

tgi che organisescha, promova u sa participescha ad acziuns da propaganda cun la medema finamira,

tgi che disreditescha u discriminatescha publicamain en ina moda che cuntrafa a la dignitat umana ina persuna u ina gruppera da persunas cun pleads, cun scrittiras, cun maletgs, cun gests u cun metter maun vi dad ella pervia da sia razza, pervia da sia etnia, pervia da sia religiun u pervia da sia orientaziun sexuala ubain tgi che snega, bagatellisescha malamain u emprova da giustifitgar per quests motivs genocids u auters crims cunter l'umanitat,

tgi che refusa ad ina persuna u ad ina gruppera da persunas pervia da sia razza, pervia da sia etnia, pervia da sia religiun u pervia da sia orientaziun sexuala ina prestazion offrida ch'è destinada a la generalitat,

vegn chastià cun in chasti da detenziun fin a 3 onns u cun in chasti pecuniar.

II

¹ Questa lescha è suttamessa al referendum facultativ.

² Il Cussegli federal fixescha l'entrada en vigur.

Na

Il Cussegl federal ed il parlament recumondan
da votar ils 9 da favrer 2020 sco suonda:

Gea

Iniziativa dal pievel
«Per dapli abitaziuns pajablas»

Midada dal Cudesch penal e da la Lescha
penala militara (Scumond da la discriminaziun
pervia da l'orientaziun sexuala)

Explicaziuns dal Cussegl federal
Edì da la Chanzlia federala
Fin da redacziun: 30 d'octobre 2019

VoteInfo
L'app davart
las votaziuns:
